

I N D I A.

Nobilissimam totius Orbis terrarum partem **INDIAM** esse, neque maiorem Regionē vno nomine comprehendī, omnes ferē Scriptores vnanimiter produnt. Ab **INDO** flumine nomen habet. Indiæ spatium, ex Strabone & Plinio, intra Indum ab Occasu; à Septentrione Tauri iugis; ab Ortu Eoo pelago; à Meridie suo, hoc est, Indico, clauditur. In duas Regiones, Gange flumine interluente dirimitur: quarū altera, quæ Occidentalis est, intra Gangem dicitur: altera ad Orientem magis, extra Gangem cognominatur. In Sacris voluminibus illam Euilat, hanc Seriam vocitatam legimus, Dom. Nigro teste. M. Paulus Venetus eam videtur in tres diuidere, in Maiorem, Minorē, & Intermediam, quam Abasiam vocari dicit. Hæc non gentium tantum, atque Opidorum prope innumerorum, sed omnium rerum prouentu (ære tantum & plumbo excepto, si Plinio credimus) felix: flumina cum plurima, tum maxima: quorū irriguo procurfu fit, vt in vdo solo, proximantis Solis vis, nihil nō magna quantitate gignat. Aromatibus, gemmisque, quibus præ omnibus aliis mundi Regionib. affatim abundat, totum ferē Orbem implere videtur. Multæ illi contiguæ sunt Insulæ hinc inde in suo Oceano sparsæ, adeo vt meritò Orbem Insularum dicere quis posset. Imprimis in eo est Iapan, M. Paulo Venet. Zipangri dicta; quæ quoniam paucis abhinc annis haud multis cognita fuit, de ea hîc nonnihil dicere visum fuit. Insula est latissimè patens, cæli eandem ferē eleuationē cum Italia habet. Incolæ Religioni, litteris, & sapientiæ sunt addictissimi; & veritatis indagatores acerrimi. Nihil illis frequentius oratione, quam more nostro sacris in Delubris exercent. Vnum agnoscunt Principem, à cuius Imperio & nutu pendent: Sed & hic sibi supremum habet, Voo illis dictum; penes quem summum est rerum Sacrarum, & Religionis Imperium; hic fortasse nostro summo Pontifici, ille Imperatori nostro assimilari posset. Huic plebs animarū suarum salutem credit. Vnum tantummodo Deum adorant, triplici capite effigiatū, cuius nullam tamen reddere norunt rationem. Infantes apud hos baptisantur: ieiuniis in pœnitentiæ testimonium corpora macerare student: Crucis signaculo contra dæmonum insultus, vt nos, se muniunt: adeo vt in Religione, & viuendi more Christianos imitari videntur: quos tamen, Societatis **IESV** professores, maximis laboribus in totum Christianæ Religionis imbuere satagunt. Sunt & Moluccæ Insulæ, aromatū fertilitate celebres, & auicula Manucodiatta (quam nos Paradyfi auem vocamus) nobiles. Est & Sumatra (olim Taprobana) Insula veteribus nota. Sunt plures aliæ; vt Iaua Maior & Minor, Borneo, Timor, &c. quas in Tabula videre licet. Has Indias ex veteribus decantarunt magnis laudibus, Diodorus Siculus, Herodotus, Plinius, Strabo, Q. Curtius, & Arrianus in vita Alexandri Magni. Extat & Epistola Alexandri Magni ad Aristotelem de situ Indiæ. Ex recentioribus Ludouicus Vartomannus; Maximilianus Transsylvanus; Ioannes Barrius in suis Asiaticis Decadibus. Sed vide etiam Iesuitarum epistolas, in quibus multa ad cognitionem Insulæ Iapanicæ facientia obuiam occurrunt. Scripsit & Ioannes Macer Iurisperitus Indicarum Historiarum libros III.